



16. august 2024

UKA 2024/120

Matumuuna Inatsisartut maleruagassaanni § 33 malillugu isummerfigisassatut aalajangigassaq una siunnersuutigineqarpoq:

Suliassani meeqqanut inuusuttunullu tunngasuni sulianik ingerlatsisarnerup pitsaanerulernissaa qularnaarniarlugu angajoqqaatut oqartussaassuseqartunik, angajoqqaatut oqartussaataasunik akuersissuteqarnermillu nalunaarutunik qitiusumik nalunaarsuiffimmik isumannaatumik pilersitsinissamut suut aporfiunersut pillugit UPA2025 nallertinnagu nassuiaasiornissamik Naalakkersuisut peqquneqarnissaannik Inatsisartut aalangiiffigisassaattut siunnersuut. Nalunaarsuiviup pilersinneqarnerata ingerlanneqarneratalu qanoq akeqarnissaannut naatsorsuinernik nassuiaat imaqqassaaq.

(Inatsisartunut ilaasortaq Anna Wangenheim, Demokraatit)

Tungavilersuut

Uuminnga siunnersuuteqarnikkut kissaatigaara, aallaqqaataasumik piareersartoqassasoq meeqqanut naleqqunnerusumik sunniuteqarluarnerusumillu meeqqat inuusuttullu tarnikkut timikkullu nappaataannik misissuisarnerup katsorsarneqartarnerullu pilersinneqarnissaa. Qitiusumiit nalunaarsuineramik pilersitsinikkut aammalu akuersinermut malitassat nukittorsarnerisigut pisariaqanngitsumik utaqqinerit allaffissornermilu nammakkersuutit annikillissinnaavagut, ullumikkut pingaarutilimmik sulineri paamaarutaasartut. Tamanna peqqinnissaqarfiup ingerlaneranut pitsanngorsaataaginnarani, aammali qulakkiissavaa, meeqqat inuusuttullu piffissaq eqqorlugu pisariaqartumik passunneqartarnissaannut.

Aammattaaq inuk pillugu paasissutissanik isumannaallisaanerup aamma napparsimasunik isumannaallisaanerup qulakkiissallugu, FN-ip inuit pisinnaatitaaffiit pisussaaffitta eqquutsinnissaa.

Isumaqarpunga, alloriarneq pisariaqartuusoq kommunini, peqqinnissaqarfimmi, oqartussanilu allani pisortat sulianik ingerlatsisarnerisa nutarterneratigut. Innuttaasunut tamanut sunniuteqarluarnerusumik naapertuulluarnerusumillu ingerlatsinermik qulakkeerinneqataassaaq – pingaartumik meeqqanut inuusuttunullu atugarliortunut aammalu meeqqanut inuusuttunullu, angerlarsimaffiup avataanut inissinneqarsimasunut.

Pisortat ingerlataanni maannakkut unammillernartuusut tunngavigalugit, allaffissornikkut ajornartoornerit meeqqanik inuusuttunillu eqaatsumik misissuillunilu passusinissaagaluanik pinngitsoortitsisarnerini, isumaqarpunga, pisariaqarluinnartoq nalunaarsuineramik pilersitsinissaaq, sullissinermi eqaallisaataallunilu toqqissimatitsisussamik taamatuttaq, inunnet paasissutissat isumannaanngitsunngorlugit pitsanngorsarneqarluni. Inernivissaa tassaassaaq isumannaassallugu meeqqanik inuusuttunillu misissuisarnerup passussisarnerullu eqaannerullunilu pisariinnerunissaa.

Ullumikkut unammillernartorujussuusoq unaavoq, meeqqat inuusuttullu misissortinnissaminnet passunneqarnissaminnullu sivisuumik utaqqitinneqartarnerat¹. Isumaqarpunga, utaqqinerit

¹[Dronning Ingridip Napparsimmavissuani tarnikkut nappaatilinnut immikkoortortaqarfimmi A1-imi OPCAT tunngavigalugu misissuineq nalunaarusiaq 7. december 2023-meersoq](#)



annikillisinnaagigut taamaaliornikkullu sullissineq eqaannerulersillugu ullumikkumiit
nassuiaatigineqartutut qitiusumik nalunaarsuinermik pilersitsinikkut.

Tamanna tunngavigalugu neriutigaarput, Naalakkersuisut Inatsisartunilu partiit sinnerisa siunnersuut
taperserumaaraat.

Pisortanut aningaasatigut allaffissornikkullu kingunissai

Nalunaarusiap suliarineqarneranut atasumik aningaasartuuteqassaaq. Taakku atorfilittap ukiumut
akissarsiaasa 500.000 koruunit qaangerneqarnissaat naatsorsuutigineqanngilaq.

Namminersorlutik inuussutissarsiuteqartunut aningaasatigut allaffissornikkullu kingunissai

Soqanngilaq.

Innuttaasunut aningaasatigut allaffissornikkullu kingunissai

Soqanngilaq.